

Pravosudna komisija Brčko distrikta BiH, na osnovu člana 14. stav (1) tačka n) Zakona o Pravosudnoj komisiji Brčko distrikta BiH („Službeni glasnik Brčko distrikta BiH“, br.: 19/07, 20/07 i 02/08) i odredbe člana 116. Zakona o Sudskoj policiji Brčko distrikta BiH („Službeni glasnik Brčko distrikta BiH“, broj: 03/21) , na ____ redovnoj sjednici održanoj dana ____ godine donosi sljedeći

PRAVILNIK O PREKOBROJNOSTI SLUŽBENIKA SUDSKE POLICIJE BRČKO DISTRIKTA BIH

DIO PRVI - OPŠTE ODREDBE

Član 1 (Predmet)

Ovim Pravilnikom utvrđuju se kriterijumi, način i postupak utvrđivanja prekobrojnih službenika Sudske policije za čijim radom je potpuno ili djelimično prestala potreba u Sudskoj policiji Brčko distrikta BiH (u daljem tekstu: Sudska policija), a na osnovu posljedica reorganizacije, smanjenog obima poslova ili ukidanja pojedinih radnih mjesta.

Član 2 (Cilj)

Do smanjenja broja potrebnih službenika Sudske policije, odnosno do proglašenja prekobrojnim dolazi zbog reformskih procesa, reorganizacije, smanjenja obima poslova ili zbog ukidanja pojedinih radnih mjesta.

Član 3 (Prekobrojnost)

Prekobrojnim biće proglašen onaj službenik Sudske policije koji, na osnovu bodovanja elemenata svih pojedinačnih kriterijuma utvrđenih ovim Pravilnikom, ostvari najmanji broj bodova.

DIO DRUGI - KRITERIJUMI ZA UTVRĐIVANJE PREKOBROJNOSTI

Član 4 (Kriterijumi prekobrojnosti)

Prekobrojni službenik odnosno namještenik se utvrđuje na osnovu sljedećih kriterijuma:

- a) godina radnog staža;
- b) stepena stručne spreme;
- c) ranijeg proglašenja prekobrojnim (tehnološkim viškom);
- d) socijalnog statusa;
- e) pravosnažno izrečene kazne za krivična djela izvršena sa umišljajem;
- f) pravosnažno izrečene disciplinske mjere za povrede službene dužnosti;
- g) ocjene rada u profesionalnoj karijeri;

Član 5 (Radni staž)

Po osnovu radnog staža službeniku Sudske policije pripada sljedeći broj bodova:

- a) za jednu godinu radnog staža u policijskim agencijama - šest bodova;
- b) za jednu godinu radnog staža ostvarenog na drugim poslovima, van policijskih agencija - dva boda.

Član 6 (Stepen stručne spreme)

(1) Po osnovu stručne spreme koja je utvrđena Pravilnikom o sistematizaciji radnih mjesta na koje je službenik odnosno namještenik raspoređen pripada mu sljedeći broj bodova:

- a) za visoku stručnu spremu - VII stepen (240 ECTS bodova) - 12 bodova;
- b) za višu stručnu spremu - VI stepen (180 ECTS bodova) - deset bodova;
- c) za srednju stručnu spremu - IV stepen - šest bodova;

(2) Ako službenik odnosno namještenik koji se boduje ima viši stepen stručne spreme od one koja je predviđena Pravilnikom o sistematizaciji radnih mjesta u Sudskoj policiji, priznaje mu se i boduje stručna sprema za radno mjesto na koje je raspoređen.

Član 7 (Ranija prekobrojnost)

Službenik Sudske policije koji je ranije proglašen prekobrojnim (tehnološkim viškom) po tom osnovu, ostvaruje bodove i to:

- a) kao službenik u policijskim agencijama - šest bodova;
- b) kao službenika izvan policijskih agencija - tri boda.

Član 8

(Socijalni status)

Po osnovu socijalnog statusa službenik Sudske policije ostvaruje slijedeći broj bodova:

- a) ako izdržava lice sa smetnjama u psiho-fizičkom razvoju - 12 bodova;
- b) ako je samohrani roditelj ili staratelj - deset bodova;
- c) ako sam izdržava članove uže porodice (uža porodica na osnovu Porodičnog zakona Brčko distrikta BiH):
 - 1. porodica sa 2 člana - dva boda;
 - 2. porodica sa 3 člana - tri boda;
 - 3. porodica sa 4 člana - četiri boda;
 - 4. porodica sa 5 članova - pet bodova;
 - 5. porodica sa 6 članova - šest bodova.

Član 9

(Pravosnažno izrečene kazne za krivična djela izvršena sa umišljajem)

Službeniku Sudske policije koji u evidenciji ima pravosnažno izrečenu kaznu za krivična djela izvršena sa umišljajem – 15 negativnih bodova.

Član 10

(Pravosnažno izrečene disciplinske mjere za povrede službene dužnosti)

Službeniku Sudske policije kojem su u personalnoj evidenciji evidentirane pravosnažno izrečene disciplinske mjere za povrede službene dužnosti i to:

- a) lakša povreda službene dužnosti – šest negativnih bodova;
- b) teža povreda službene dužnosti – osam negativnih bodova.

Član 11

(Ocjene rada u profesionalnoj karijeri)

Službeniku Sudske policije kao ocjena rada u profesionalnoj karijeri uzima se prosječna ocjena rada u trogodišnjem periodu koji prethodi postupku utvrđivanja prekobrojnosti i to na sljedeći način:

- a) ako je prosječna ocjena rada do 3,0 – četiri boda;
- b) ako je prosječna ocjena rada od 3,1 do 4,0 – osam bodova;
- c) ako je prosječna ocjena rada od 4,1 do 5,0 – 12 bodova.

DIO TREĆI - NAČIN ODREĐIVANJA PREKOBROJNOSTI

Član 12

(Odbor za određivanje prekobrojnosti)

(1) Bodovanje službenika Sudske policije na osnovu kriterijuma utvrđenih ovim Pravilnikom vrši Odbor za određivanje prekobrojnosti (u daljem tekstu: Odbor).

(2) Odbor iz stava (1) ovog člana ima tri člana i imenuje ga Pravosudna komisija iz reda službenika pravosudnih institucija koji imaju položen pravosudni ispit.

Član 13

(Obaveze Odbora)

(1) Odbor vrši prikupljanje podataka po kriterijumima koji se boduju.

(2) Rezultate bodovanja - Listu sa redoslijedom službenika odnosno namještenika (pregledom broja bodova po osnovu svakog kriterijuma pojedinačno i zbirni broj bodova za svakog radnika) Odbor objavljuje na oglasnoj tabli Pravosudne komisije u roku od 15 dana od dana utvrđivanja liste.

Član 14

(Proglašenje prekobrojnim)

(1) Prekobrojnim se proglašava službenik odnosno namještenik koji nakon bodovanja od strane Odbora ima najmanje bodova.

(2) Ako dva ili više službenika odnosno namještenika imaju isti broj bodova, prekobrojnim biće proglašen onaj koji je ostvario manji broj bodova po osnovu radnog staža u Sudskoj policiji.

DIO ČETVRTI - ZAŠTITA PRAVA SLUŽBENIKA I NAMJEŠTENIKA

Član 15

(Žalba)

Službenik Sudske policije koji smatra da nije pravilno bodovan ima pravo podnijeti žalbu Pravosudnoj komisiji u roku od osam dana od dana dostavljanja rješenja o prekobrojnosti.

Član 16

(Odluka po žalbi)

Odluka Pravosudne komisije je konačna i izvršna.

Član 17
(Trajanje prekobrojnosti)

(1) Prekobrojnost može trajati najduže tri mjeseca uz otkazni rok od 15 dana.

(2) Otkazni rok počinje teći istekom posljednjeg dana prekobrojnosti iz stava (1) ovog člana.

Član 18
(Otpremnina)

Službeniku Sudske policije koji je proglašen prekobrojnim u cijelosti, a kome nije moglo da se obezbijedi adekvatno radno mjesto u skladu sa Zakonom o službenicima i namještenicima u pravosuđu Brčko distrikta BiH, prestaje radni odnos uz obavezu poslodavca da mu isplati otpremninu u skladu sa odredbama Zakona o platama i naknadama zaposlenih u pravosuđu Brčko distrikta BiH.

Član 19
(Zabrana proglašenja prekobrojnim)

Poslodavac ne može otkazati ugovor o radu službeniku Sudske policije za čijim je radom prestala potreba usljed ekonomskih, organizacionih i tehnoloških razloga za vrijeme trudnoće, porodijskog odsustva, roditeljskog odsustva i skraćenog rada radi njege djeteta.

DIO PETI - PRELAZNE I ZAVRŠNE ODREDBE

Član 20
(Primjena propisa)

Na pitanja vezana za prava službenika i namještenika, koja nisu regulisana ovim Pravilnikom, primjenjuju se odredbe Zakona o Sudskoj policiji Brčko distrikta BiH, Zakona o službenicima i namještenicima u pravosuđu Brčko distrikta BiH i Zakona o radu Brčko distrikta BiH.

Član 21
(Stupanje na snagu)

Ovaj Pravilnik stupa na snagu danom donošenja, a objaviće se u „Službenom glasniku Brčko distrikta BiH“.

PREDSJEDNIK
PRAVOSUDNE KOMISIJE

Safet Pizović

Broj: SuPK-03-____/21

Datum: _____.